

申報

釋擬征臺灣生番論

忝生榮陽氏稿

前閱各處新聞紙報，數擬國家議征臺灣生番者，緣僅見生番之暴戾，未明悉臺灣之情形也。蓋人但知生番不除之爲害，不知生番不除之爲利焉。夫臺灣地勢，區分前後，吾人所居者，惟山前西南沿海一帶耳。山後東北，全屬生番，種類不知凡幾，皆以數十百人，集處一隅，穴土而居，冥頑野性，禽獸奚殊，日夜出沒不常，或潛跡茂林，或藏身穴窟，耽耽窺伺，吾人墾耕，必結隊以往，或稍離群，獨行山僻，適值其來，必遭殺害，臺地夙無虎豹，人遇生番，猶同虎噬，若糾衆持械追殺，則躊躇如猱，望風奔走，莫敢相拒。如果國家有欲殄除之舉，不必勞雄兵猛將，糜費與師，祇須招募土人千餘，策而攻之，不難滅此而朝食也。然國家體上天好生之德，姑留其類者，何也？蓋以臺灣地方亘長，民多強悍，山川險阻，盜賊紛紜，動輒嘯聚，擾攘不時，一被官軍追迫，輒縮入內山，扼險死據，以山中生番之殘酷，尙且如斯，苟將生番殲除淨盡，則深山窮谷，官守不周，豈不反成賊藪哉？昔有臺灣道鎮某公，思維生番深爲民害，曾經奏請興兵蕩掃，繼奉諭旨，寧爲番窟，不爲賊巢，因之而止。不然，生番之患，非止一日，朝中豈無征滅之議，何至留於今日，任其滋害中外生民乎？此中底細，有非外人所能深知者。又況誅戮過甚，民與番之怨愈深，赦免餘殘，盜與番之交反固，恐爲患尙不止如今日。誠諺所謂多一事不如少一事也。有心世道者，諒不以此言爲河漢也。